

Uunga siunnersuut: Aalisarnermik piniarnermillu inuussutissarsiutillit inuussutissarsiornerannik siuarsaaneq pillugu Inatsisartut inatsisissaat nr. xx,xx 2012-imeersoq.

Saqqummiussissut

(Aalisarnermut, Piniarnermut Nunalerinermullu Naalakkersuisoq)

Siullermeerneqarnera

Naalakkersuisut una inatsisissatut siunnersuut atorlugu aalisartut piniartullu inuussutissarsiutit siuarsarniarlugit aningaasaliissutinik pisimasut 60-ileersimasullu akiitsuminnik isumakkeeriffigineqarnissaat eqqutteqqinniarpaat. Akiitsut isumakkeerneqarsinnaanerannik periarfissaq siusinnerusukkut atuussimavoq, sulilu aalisartunut 2007 sioqqullugu taarsigassarsimasunut atuulluni. 2006-imi aalisarnermik piniarnermillu inuussutissarsiutillit inuussutissarsiornerannik siuarsaaneq pillugu peqqussutip maanna atuuttup Inatsisartunit akuerineqarneratigut akiitsunik isumakkeerfigineqarsinnaaneq peerneqarpoq. Inatsisissatut siunnersuummi uani aalisartut tamarnik assigiimmik pineqalissapput.

Tassunga tungaviuvoq, aalisartut piniartullu utoqqalisut amerlasuut akiitsullit, ukiuminnut akiitsumillu annertussusaat eqqarsaatigalugit akiitsuminnik akiliiniarnissamut ajornartorsiu-teqarsinnaammata. Amerlanerit pigisaqanngillat akisuunik nalilinnngortissinnaasaminnik, taammaammallu akiitsutik allatigut akilersorneqarsinnaanissaat ajornartorsiuutigissallugu. Naalakkersuisut taamatut siunnersuusiornikkut, inuit taakkua ataqqinassusertik attatiinnarlugu inuussutissarsiuutiminnik ingerlatsiunnaarnissamut periarfissikkumavaat.

Aammattaaq una inatsisissatut siunnersuut aqutigalugu Naalakkersuisut angallammik piginnittumut piumasariniarpaat inuussutissarsiutit siuarsarniarlugit aningaasaliissutinik pissaguni, angallammik pinngitsoorani sillimmasiisimasariaqassasoq. Tamanna eqquneqarpoq angallat annaaneqassagualarpat qularnaveeqqummik annaasaqannginnissaq qulakkearniarlugu. Sillimmaserneqarsimanissamik piumasaqaateqarneq aammattaaq inuussutissarsiutigalugu umiatsiaararsiniarnermi tapiissutinik pisunut atuutissaaq, taamaalilluni taak-kuttaaq umiatsiaaqamik umiusimanerisa kingorna inuussutissarsiumminik annaasaqannginniassammata.

Peqqussummut atuuttumut naleqqiullugu allannguutit allat kingunerisassanut iluarsinerupput allatullu annikinnerusumik aqqissutaallutik.

Taamatut oqaaseqarlunga allannguutissatut siunnersuut Inatsisartunut suliassanngortippara.

